

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj : 32 0 St 452243 23 St
Tuzla, 07.11.2023. godine

Općinski sud u Tuzli, stečajni sudija Vedran Milašinović, u postupku predhodnog ispitivanja prijedloga za otvaranje stečajnog postupka nad dužnikom „FITOB“ d.o.o. za proizvodnju, montažu i servisiranje alarmnih uređaja, unutrašnju i vanjsku trgovinu Tuzla, ul. Bosne Srebrene 56, dana 07.11.2023. godine donio je slijedeće,

RJEŠENJE

POKREĆE SE PRETHODNI POSTUPAK radi utvrđivanja uslova za otvaranje stečajnog postupka nad imovinom privrednog društva „FITOB“ d.o.o. za proizvodnju, montažu i servisiranje alarmnih uređaja, unutrašnju i vanjsku trgovinu Tuzla, ul. Bosne Srebrene 56.

Za privremenog stečajnog upravnika imenuje Nedret Kikanović iz Tuzle, ul. Aleja Alije Izetbegovića 25.

Privremeni stečajni upravnik dužan je odmah po prijemu rješenja o imenovanju preduzeti radnje utvrđene odredbom člana 63. Zakona o stečaju, a naročito:

- obezbijediti imovinu dužnika i starati se o istoj,
- ima ovlaštenja da uđe u poslovne prostorije dužnik i provede neophodne radnje,
- utvrditi da li postoji razlog za otvaranje stečajnog postupka,
- ispitati da li će imovina stečajnog dužnika pokriti troškove stečajnog postupka,
- utvrditi da li se poslovanje stečajnog dužnika može u cjelini ili djelimično nastaviti u toku prethodnog postupka i
- uraditi kontrolu poslovanja stečajnog dužnika.
- kada je podnosilac prijedloga za otvaranje stečajnog postupka stečajni dužnik, dostaviti izjašnjenje da li je stečajni dužnik, odnosno organ ovlašten za zastupanje stečajnog dužnika podnio prijedlog za otvaranje stečajnog postupka u roku od 60 dana od dana nastupanja platežne nesposobnosti.

Privremeni stečajni upravnik dužan je podnijeti svoj pismeni izvještaj ovom sudu u roku od 30 dana od dana donošenja ovog rješenja u kome će izvijestiti ovaj sud o preduzetim radnjama i iznijeti svoje stručno mišljenje o tome da li postoje razlozi za otvaranje stečajnog postupka, odnosno da li postoje bilo kakvi izgledi za nastavak daljeg poslovanja dužnika.

Mjere pojedinačnog prinudnog izvršenja pokrenute protiv stečajnog dužnika se obustavljaju, izlučna i razlučna prava povjerioci ne mogu ostvariti u predhodnom postupku, stečajni dužnik ne može raspolagati budućom stečajnom masom bez saglasnosti privremenog stečajnog upravnika i suda, a sve to u cilju osiguranja buduće stečajne mase.

Rješenje će biti objavljeno u „Službenim novinama F BiH“, web stranici Općinskog suda u Tuzli i na Internet stranici FIA-e, te se pozivaju povjerioci da privremenom stečajnom upravniku bez

odlaganja dostave prijedlog mjera osiguranja na predmetima stečajnog dužnika koje će eventualno zahtijevati.

Ovo rješenje će se dostaviti Odjeljenju registra ovog Suda, Zemljišno-knjižnom uredu Općinskog suda u Tuzli i Službi za geodetske i imovinsko-pravne poslove Tuzla, radi upisa zabilježbe otvaranja prethodnog postupka.

Obrazloženje

„FITOB“ d.o.o. za proizvodnju, montažu i servisiranje alarmnih uređaja, unutrašnju i vanjsku trgovinu Tuzla, ul. Bosne Srebrene 56, kao dužnik podnio je dana 13.09.2023. godine ovom sudu prijedlog za otvaranje stečajnog postupka nad ovim privrednim društvom, zbog platežne nesposobnosti stečajnog dužnika.

Stečajni sudija nakon što je utvrdio da je prijedlog za pokretanje stečajnog postupka podnesen od strane ovlaštenog predlagача u smislu odredbe člana 58. stav 1. i 2. Zakona o stečaju („Sl. novine F BiH“, br.53/2021. u daljem tekstu Zakon o stečaju) i da je isti dopušten, dana 25.10.2023. godine, naložio je predlagачu da uplati novčana sredstva na ime predujma finansiranja troškova prethodnog postupka radi utvrđivanja uslova otvaranja stečajnog postupka.

Predlagач „FITOB“ d.o.o. za proizvodnju, montažu i servisiranje alarmnih uređaja, unutrašnju i vanjsku trgovinu Tuzla, ul. Bosne Srebrene 56, je dana 06.11.2023. godine dostavio sudu dokaz o uplati predujmljenih sredstava za finansiranje prethodnog postupka u iznosu od 3.000,00 KM.

Na osnovu priložene dokumentacije i to: odluka o prestanku rada društva i pokretanju stečajnog postupka od 13.09.2023. godine, rješenje o izmjenama podataka od 05.09.2023. godine, potvrda o blokadama ASA Banke d.d. Sarajevo od 11.09.2023. godine, bilans uspjeha za period od 01.01.-31.12.2022. godine, bilans stanja na dan 31.12.2022. godine, uvjerenje UIO od 18.09.2023. godine, uvjerenje PU od 19.09.2023. godine i uplate predujma od 3.000,00 KM, predlagач je učinio vjerovatnim platežnu nesposobnost.

Na ročištu za saslušanje stečajnog dužnika održanog dana 25.10.2023. godine, zastupnik je izjavio da društvo ne posluje zadnjih 5 godina. Društvo nema zaposlenika, sve obaveze prema radnicima su uredno izmirene. Društvo nema dugovanja prema UIO, a u pogledu stanja prema PU je PU izvršila kontrolu 2016. godine i utvrdila određene nepravilnosti, na šta je društvo blagovremeno izjavilo pravni lijek o kojem nije odlučeno sve do jula ove godine na način da je isti odbila, te je stečajni dužnik protiv tog drugostepenog rješenja pokrenuo upravni spor pred Kantonalnim sudom u Tuzli. PU je pokrenula postupak prinudne naplate u mjesecu oktobru 2023. godine. Iz uvjerenja koje je dala PU proizilazi da dug iznosi od 124.701,49 KM s tim da je navedeno predmetom pobijanja u upravnom sporu. Podignuta je tužba protiv Mladena Filipovića, a kako je tužbeni zahtjev odbijen dužnik je obavezan da plati troškove postupka. Navedeno lice je pokrenulo izvršni postupak te je time i blokiran račun društva od datuma navedenog u potvrdi banke (dana 21.11.2022. godine) pa sve do danas. Osim obaveze na osnovu kojeg je blokiran račun, te navodne obaveze prema PU društvo nije nikome ostalo dužno. Društvo nema bilo kakve imovine, poslovni prostor je prodat 2018. godine kada je društvo prestalo sa obavljanjem djelatnosti, a radi izmirenja nekih tadašnjih obaveza, nema pokretnih stvari a račun je blokiran. Predlaže sudu da odredi predujam i otvori prethodni st. postupak, a potom i stečajni.

Iz svega navedenog proizilazi da društvo nije u mogućnosti izvršavati svoje dospjele obaveze od momenta dospijea u neprekidnom trajanju dužem od 60 dana od dana nastanka obaveze. Konačno stanje u pogledu eventualno drugih obaveza bi se moglo utvrditi u slučaju određivanja privremenog stečajnog upravnika koji bi sudu dostavio izvještaj o poslovnom stanju kod predlagача sa izjašnjenjem o uslovima za otvaranje stečaja.

Na osnovu podnesene dokumentacije i zakonskog zastupnika stečajnog dužnika, sud nije u mogućnosti da sam procijeni postojanje svih neophodnih uslova koje Zakon predviđa za otvaranje

stečajnog postupka, te se donosi rješenje o pokretanju prethodnog postupka radi utvrđivanja uslova za otvaranje stečajnog postupka nad dužnikom, temeljem odredbe člana 61. stav 1. Zakona o stečaju.

Odluka iz stava 3. ovog rješenja donesena je temeljem odredbe člana 63. Zakona o stečaju, a nakon što je utvrđeno da privremeni stečajni upravnik ispunjava uslove za imenovanje utvrđene odredbom člana 71. Zakona o stečaju.

Na osnovu navedenog, temeljem citiranih odredbi zakona, sud je odlučio kao u izreci rješenja.

Stečajni sudija
Vedran Milašinović

POUKA O PRAVNOM LIJEKU: Protiv ovog rješenja dozvoljena je žalba u roku od 8 (osam) dana, računajući od dana objavljivanja. Žalbu mogu uložiti stečajni dužnik i privremeni stečajni upravnik. Žalba se podnosi Kantonalnom sudu putem ovog Suda.